

拜

經

樓

詩

集

予以嘉慶癸亥之春哀次舊稿得古

近體詩子餘首為

拜經樓詩集十二卷梓以問世距今

茲將早藪摭拾

賸復得三百餘首為續編四卷附詩餘一卷曰萬花漁

唱續授劄氏噫是亦不可以已乎憶予自少癖耽吟咏

每遊武林輒喜從諸名宿譚藝嘗聞諸堇浦杭先生之

言曰吾人讀書修業要使他日一言一咏有可以刻而

傳之者藉以自攷其得失非求勝于人也間復論及詩

道之源流先生曰浙中詩派夙宗唐音蓋源自雲間昔

陳臥子先生為紹興司李名重于時吾杭西泠十子咸

從問業各得黃門之一體嗣是西河竹垞諸君皆宗法

唐音與新城尚書遙相應和自吳孟舉陳言揚等三數  
公專以宋詩爲尚學者靡然從之于是浙西風雅幾爲  
之一變苟有好學深思之士起而振之力求復古安在  
其不可復還舊觀也予深韙其言迄今忽忽猶昨日事  
屈指先生之歸道山且四十載矣先生文章學術爲世  
所宗仰積久彌光惟予少旣失學晚益頽廢無成微特  
昔賢涯涘末由津逮卽欲希風前輩亦復譚何容易有  
負于先生之教誡者不亦多乎粹旣成漫書數語以識  
丙媿壬申孟春穀日八十老人騫自題

拜經樓詩集續編序

詩文之有宗派猶水之有源也當衆流雜出時必有甄  
修耆碩之彥主持之非必躋高位膺顯爵焉一畝之宮  
環堵之室守道好學其言行所被涵湛淵漬親之者默  
與俱化此經人之師所以爲天下法也往時吾浙能文  
之士持之皆有本源故發爲詞章矜慎蘊藉有一倡三  
歎之音自一二雄才大力者侃然以古人成法爲不足  
守於是揮霍汗漫縱其心之所欲言而惟恐不肆夫至  
於惟恐不肆其弊可勝言哉海昌吳兔牀先生物疎道  
親以不朽盛業自任其說經博綜漢唐諸家之言而折

衷於至是其文宗法廬陵南豐下及震川堯峰皆能入其堂奧其詩弇有歷代諸家之長而於漁洋山人爲尤近蓋有本之學探之無窮而出之愈慎故醇粹深摯非幹材諷說者所能幾及也昔侍先生謁吾師秦少司寇於梁溪里第同舟南下縱論詩文流別先生謂浙中先哲其源皆出於忠裕陳公後雖各極其變然先路之道必由是始記曰昔我有先正其言明且清蓋未有畔其先正而能立言成家者先生之言如此故所著拜經樓集皆本末深茂卓然爲後學津筏足以信今傳後無疑焉先生行年八十精神未衰著作等身皆手自校勘頃

以續集告竣命熊飛附名集後夫以先生學術之淵邃  
才情之閎雅其於古人規矩猶神明變化未嘗稍踰尺  
寸則世之放而不知收者讀先生是集其亦可以自反  
也已嘉慶十七年仲秋之月吳興年後學徐熊飛拜撰

拜經樓詩集續編總目

卷一

起嘉慶癸亥  
春盡是年冬

古今體詩六十五首

附 詩九首

卷二

起甲子春  
盡乙丑秋

古今體詩一百二首

附 詩一首

卷三

起乙丑冬  
盡戊辰冬

古今體詩九十三首

附 詩二首

卷四

起己巳春  
盡辛未秋

古今體詩一百四首

通計古今體詩三百六十四首

附 詩十二首

詩餘

萬花漁唱一卷



兔牀先生八十歲像

孝經疏元題



拜經樓詩集續編卷之一

起嘉慶癸亥  
盡是年冬

海寧 吳 騫 槎客

同萬香南黃柿庵游善卷小憩溪亭

以下  
癸亥

夜話墨陽樓朝尋墨陽麓春風動微暄澗冰漱寒玉未  
搖沙邊艇嵐翠已可掬言攜素心侶逍遙興方屬笠分  
澆女雲炊然漁父竹望望古招提紅牆秀羣木祝陵聊  
弭楫筇屐延山綠緬茲松風亭翛然泉上卓匡坐俯潺  
湲塵纓良可濯

登南岳伏虎寺閣復偕香南柿庵尋卓錫泉洗腸

池諸勝

傑閣峻嶒勢欲浮，靈山宛轉入吟眸。  
雨昏古壁龍光蝕，日落陰巖虎氣收。  
碧樹難尋楓隱跡，珍珠空溼翠雲裘。  
塵腸一寸如容洗，操共南能老去休。

次元韵

荆溪 萬之蕪 頊爲

檣棹溪頭澹日浮，更憑高閣一開眸。  
回峯曲磴層層列，雲影天光面面收。  
濟勝故應攜阮屐，衝寒直欲裹嚴裘。  
洗腸池畔泠泠響，坐對珠簾聽未休。

同作

荆溪 楊 敷 芝茂

松濤萬頃閣邊浮，倚檻東風欲射眸。  
半壁霏煙龍氣吐，四山積翠蠡意收。  
臨池水色明寒玉，穿徑藤梢攬

敝裘吟到春芳意無限碧雲佳句愧湯休

荆南女史笄芝田爲姬人寫小照

芝田名玘侍御重光之後

侍御清風遠幽居近碧鮮神來濡彩筆興到拂霞牋半面徐家飾前身天女禪離居張素壁幾認比香肩

同梧厓春浦蘭谷游慧山

良辰賦佳游曠若脫塵屣聯步西巖陰迢遙問空翠清谿轉叢薄時鳥鳴相對蕭然停午餘半嶺景猶曠亭廊互縈跣蘿磴紛鈎寄涓涓碧瀉流暗引風篁細尋芳憐士女三五韶姿麗如聞拾翠言啜茗春臺未前游無盡境西日明茜袂佛圖半雲隱煙磬流空唄何處更幽期

蒼蒼石門晦

楊子霽雲爲姬人寫第二照

忽觀芙蓉面吹來林屋居天花元有相金粟妙何如黛  
抹浮雲淺波流壁月虛還如載龍女煙水到吾廬

同梧厓春浦蘭谷游虎邱花神廟

因尋玉遮勝又過沈尤村水閣花明檻松寮鶴應門彈  
棋敲玉子選句倚雲根何處春鴻外飛來雨一痕

陶山刺史招同梧厓春浦蘭谷西林集樂園寓齋

卽席送其入 覲歸途至山左省墓

三年恒苦別愁牽握手重來詎偶然鬢上又添吳苑雪

詩中多說海門煙斷碑荒蘚思前夢花月清樽問後緣

此去朝天編集了春暉滿袖到瀧阡

楊誠齋有朝天集

槎客屬題細雨東風畫冊卽送歸海昌二首

善化

唐仲冕六幕

畫舫看山已卅年我來讀畫記從前曾經罨畫溪邊

路頻上米家書畫船

自製瓜皮一葉輕長年載石壓風行

余有一小船名石舫却憐

便面催春騎爭似五湖煙水清

再過秋帆尚書故宅有感

闔閭城下繫輕舟步履聊爲樂圃游江上蘼蕪成短夢

手澤未言  
卷之十一  
籠中鸚鵡說離愁  
銜恩豈乏當年士  
頌酒空來此日儂  
惟有春風都不管  
又吹楊柳綠遮樓

同梧厓春浦蘭谷游王珣宅

幽尋短簿祠  
屐印蒼苔澀脩廊  
不見人花氣微熏佛

吳門舟夜梧厓春浦蘭谷各有詩贈別率酌四絕  
卽送三子歸陽羨

又向東風別袂判  
闔閭春水正瀾漫  
船娃學得吳娘曲  
不怕瀟瀟暮雨寒

三尺墳荒長綠蕪  
五更月落又啼烏  
明朝縱有要離劍  
滿眼離愁斷得無

曲池漸平二百秋，弔古共立莓苔岸。猶聞夕磬東林來，  
楊柳千條色爲變。塵埋畫篋冷諫草，鳥散游魚咬花片。  
屈原旣死楚亦亡，其奈懷王終不見。

夜夢亡婦示蘭貞

不共艱辛已七年，孤魂蕭瑟泪淪漣。猶持一片秦川錦，  
爰與陽臺繡玉蓮。

擬今日良燕會送雪樵之福建參戎二首

今日良燕會薰風，拂鳴絃四坐樂且清。聆我懇欵言惟  
君本洪族，世篤忠貞傳。讀書慕終古，高步凌風騫。天南  
奮先烈，弧矢澄妖躔。于以垂芳林，豈不在嗣賢。結髮身



許國努力事戎旃  
慷慨擊楫歌蒼涼  
寶劍篇落日滿黃  
岡一旅常孤懸  
睢陽古遺廟草暗  
孤鳴天自從貳師  
來薄海無烽煙

今日良燕會中忱  
何由釋一老臥荒  
墟萬事向逼仄君  
乃獨不遺相吹恒  
以息伊昨蓬廬欵  
園蔬任小摘金石  
要不渝圖史互鈎  
索瓦盆浮春醪或  
黃而或碧來疑月  
墮懷去聽潮鳴汐  
追歡意方永忍遽  
言離別驪駒忽載  
道悵望徒緘臆聞  
海雖云遐猶共魚  
龍國想當鎮百蠻  
嘯歌凌八極武夷  
溪九曲幔亭雲滿  
席俯仰碧天際目  
送飛鴻翼惟應數  
寄書悞我長相憶

感興

茸茸芳草綠汀波寂寂青山對薜蘿惆悵終朝綠底事  
花殘酒冷鴈聲多

題雪樵鹽官留別圖卽送之福建

二首

赭岸欣連幕府清紫泥新 命拜專征圖麟自昔無難  
事班馬如今有別聲灑灑襟懷高士筆依依楊柳故人  
情異時百尺還凝望如見樓船下瀨橫

闕關本自控嚴疆此去何辭道路長萬仞仙霞迎虎節  
三千豹旅逐龍驤家聲蚤懾鯨波外嘯咏仍來羽扇旁  
淥酒紅螺嘉宴日只應攜手憶河梁

宛委攤書圖爲雪樵騎尉題

平生抱書淫結習在文字如飢待朝餽甚渴慕湯餌典

質償無盈擘擋及嬌嬖罔顧柳津嗤遑恤秦吏議惟恐

銀魚灣舟罕荅郎繫

村中書船多泊于銀魚灣口

吾邑儲藏家馬陳

宿僂備道古宿草荒春暉夕陽逝

海昌藏書向推馬寒中上舍道古樓陳世

南侍郎春暉堂未久皆散佚

拮拾想叢殘過眼煙雲駛中心轉悵悵

窮年走蹶蹶南披繡谷幃

繡谷亭吳氏累世藏書爲武林最

北發婁江

笥

太倉陸翁潤之插架極富昔嘗借抱經學士至其家觀之多宋元善本生平所未見也

尤喜鮑

明遠歲月成交會

于與綠飲各以書相假且仿昔人歲月爲書會

奇觚每傳鈔

祕冊互鈎寄契勘敢辭勞丹黃亦有致猶慚聞見隘誰

與發聾贖陳侯越江來傾蓋同深嗜君山饒賜書伯玉  
矧多識壯武三十乘餘財非所計峩峩百城業遠欲駕  
清祕芸香凝燕寢屐屨列墉肆凌晨手一編日肝未忍  
寘憐子炳燭光常許析疑義有暇輒檢應無取還瓶醉  
旬時面不覿卅里頓頻置至今萬花

堤名

陰長走縹囊

使猗與好古心知非此生蒔暇復倩良工巧運倪黃思  
解衣恣盤薄脫帽露高髻綠樹靄扶蘇風泉響雲際居  
然尺五天可縮二酉地君今已專閫千里雄征旆行攜  
萬卷借快讀爰窻蠣鎮以玉辟邪麾餘鐵如意朱顏畫  
戎蠻金冊馳仙吏左持委宛圖右把浮邱袂功成不受

爵舊雨懷前契歸來蓬萊閣更續鄉嬛記

同人集煙波水月亭餞雪樵卽席

四首

東海煙雲蔽西園雅集期紅榴迎阜蓋翠羽識青旗  
密坐魚窺席疎簾雨散絲青門饒帳飲何似習家池

十載託心契千秋竟若何狂奴仍落拓大樹幾摩挲  
橫海將軍業樓船下瀨歌回思舊游地把酒聽鶯多

迤邐城南路依稀第五橋桐臺閑啜茗松塢忽聞潮  
歌待驪駒發心懸魏闕遙從來漢飛將多數霍嫖姚

金石間瓊珉分攜滿袖香書名王內史畫稿郭河陽

席間

雪樵以詩聯及石刻  
各種分贈諸同人  
虎竹新分重鯨波世澤長寸心何

以喻千里渡蓮洋

偶書

久知身世一蘧廬出處何妨也自如昨日冶游今日學  
半牀花影半牀書

秋日喜汪蕙畦偕陶西疇見訪並示近著卽席首

滿徑颯秋意疎桐殊未凋故人天外至離恨酒邊消欸  
竹延新月登樓聽夜潮名山商略罷華鬢兩條條

維摩欣病起挈伴出離羣村名幾度金閨柳同歌白練裙

幽懷陶隱士陶詳居陽羨方干有贈其隱居詩名畫李將軍從此山翁

杖長挑五老雲西疇爲子作齊雲採藥圖

昔年袁彥道

簡齋

愛爾最能詩一卷千秋業雙溪四海知

驂騮困長坂管葛老明時還把滄浪意殷勤問釣師

雪帆夢至竹下書堂得詩一首覺以見眎因次其

韻

碧梧元乏鳳凰枝萬个蒼筤伴最宜何處勾留君夢好  
夜深雲破月來時

某郎中脩竹吾廬圖

辭祿歸來鑑水濱東風吹水滌鱗鱗君王若問廬中事  
萬个琅玕一个臣

祝蘭泉司寇八十初度

二首

捧袂西冷又二年湖雲浦樹致纏綿山中宰相懷宏景  
里第尚書羨樂天琴曲歌隨鶴南翥霞籌添自海東偏  
尤憐天馬羣仙會萬樹紅梅醉偃佺

精神龍馬氣雄虹出處奚慚止足風報國勳名傳國史  
還山啟事重山公重編金薤琳琅外再赴瓊林指顧中  
東帛蒲輪并几杖天書連下翠微宮

雲岫庵觀烘經作同差山

發興尋海嶠攜手緣湖球旃檀引客聞遠與風吹至十  
里路九曲載陟還載憩晴嵐冒重巘陰壑遞虧蔽攀蘿  
險乍脫逼面峰旋避飛猿不畏人霜隼搏空翠孤筇仄



徑攬峭壁流泉細，逡巡歛元關。雲外疑無地，卓爾傑閣  
蹲。終古苾芻閱殘經，剩榆櫺磨滅半無字。苟微篤耨熏  
詎道脈望伺煩襟，互披尋若灌醍醐。味氤氳散諸天六  
合渾，一氣渺哉窻中帆。輕鳧點霞際，成連未可期。暇問  
浮卽袂夕磬，下中峰蒼煙雪竇晦。却聽九門潮，猶作杯  
底沸。

登鷹窠頂觀海

仰天塢側石望夫，導我直上鷹所都。鷹雛拍拍鷹母呼，  
嗟客至此何爲乎。一枝瘦藤雙不借，還有王喬鶴高跨。  
玉笙吹醒靈胥詫，君才豈在元虛亞。海天八月風怒號，

海山萬里同連鰲。鯤鵬變化特細專。羊角展轉矜扶搖。  
蓬萊仙人絳霓袍。芙蓉亭亭手獨操。爲言有酒若春露。  
一醉千日昏冥逃。笑謂仙翁固癡絕。濁醪正可憫寥沈。  
我有同心在窮髮。鴈斷三秋浪騰雪。故知十書九未集。  
夢魂又恐蛟龍得。惜哉徐市竟不歸。蒼茫立盡風吹衣。  
秦王廟冷美人死。還丹那救生民飢。君不見紫雲嶺下  
石帆脚。一帆始挂一帆落。又不見徐灣宅畔野人家。踏  
破蛟門尋石華。溟渤昏昏萬古哀。與君且下景升臺。元  
冥轉瞬月初吉。更看扶桑合璧來。吸盡日華飲沆瀣。鼓  
以氣母息以胎。俯仰百年三萬日。何妨遊戲同嬰孩。

永安湖雜詩示差山 十二首

十里芙蓉玉露凋，海天秋色晚蕭蕭。  
可堪金縷同攀客，又聽昏鴉過柳橋。

會骸山下幾凝思，此筆慚稱老畫師。  
萬疊雲松千澗瀑，

此中真趣獨君知。

予以舊作廬山水墨畫贈素文上人，差山題詩其上。

紅牙小隊按涼州，綠酒銀燈歲歲游。  
今夜月明何處望，寒潮嗚咽過粧樓。

夢斷文溪七十年，幾家喬木冷秋煙。  
白頭剩有孤兒淚，

何日還揮孝女阡。

外祖程紹夔州佐家文溪塢地最幽，勝兒時常侍先慈過之，公無嗣先慈

為營葬于泊瀟山之羅漢灣，人稱孝女阡云。

杜曲岡連扇里灣，數間小築傍吳山。山僧鎖日牢扃戶。

幽夢只隨雲往還。

吾家吳山小築，踞四山之勝，惟令一僧守護松楸。

玉鳧金鴈委荒荆，秋草空埋帝子塋。比似通天臺畔路。

莫教腸斷沈初明。

天子墓在石牌橋南，詳董穀續水志。

高士清波夕照酣，久無鶯坐柳毵毵。玉棋待到春如海。

更訪儂家萬雪庵。

啄花鶯坐水楊柳，願玉峯和人游永安湖句。

南湖霜蟹北湖菱，新蕢茅柴酒幾升。水月庵邊歸路晚。

醉看佛火作漁燈。

已撤瓜棚未築場，繞門橘綠間橙黃。客來小摘松菇蕈。

添得廚娘手爪香。

皋蘇廟裏賽神回秋社豚蹄酒一杯醉聽牧兒三弄笛

金牛何事不歸來

皋蘇二將軍廟舊在金牛洞側歲久傾圮今移建金牛山下余請秦小峴

廉使書廟額并立二將軍神位

山作墳堂樹作屏一泓秋碧孝泉清回思競渡芳春日

士女都來鏡裏行

從兄東山先生建墓祠于夏灣山麓庭下有泉漢出詳子孝泉記宋時永

安湖春日游人作競渡故有小西湖之稱詳常棠激水志

寄奴東望日初昏又聽鯨音徹海門最是防秋諸將士

年來辛苦怨孫恩

年來頗多海警

同差山登湖天海月樓

樓在錢魯南先生丙舍傍子治生墳卽樓西南

桐帽櫻鞵結勝游蒼茫何處豁雙眸潮聲不到天仙廟

山色偏歸海月樓八咏風情傳在昔百年身世落悲秋  
憑君莫問邠卿事分付斜陽與白鷗

過三女堆二首

三女堆在長安鎮覺王寺後舊志相傳吳大帝第三  
女所葬蓋公主魯育墓也按吳志主以不附廢太子  
之謀爲孫峻所害初葬石子岡歸命侯時改葬斯殆  
其改葬之墓與裴松之註吳志引搜神記改葬時令  
兩巫覡冢旁各言見主顯形衣飾如斂時而談氏海  
昌外志又載三女堆嘗有怪明萬歷中歲飢盜發之  
不甚得今其冢猶高大宰木皆合數人抱頃歲寺後

有過者拾得挺韞花文躡籍感而賦此

東吳遺蹟俯驚湍蕭史難尋鳳吹殘祇道梅花曾點額  
豈期校尉忽憑棺玉魚久撤禪燈照璧月休同破鏡看

松霽潛山二君竝疑公主當日未必有改適劉纂事者有辨

却羨夫人歸漢日幽魂

長傍惠陵安

石子岡邊改葬時依稀綈履步來遲朱顏尚有巫能識  
白骨誰言鬼可欺推刃至今嗔大虎殃魚何處問孫儀  
紙錢社酒脩川路千古行人一涕洟

萬蒼山下作

晴波澹渺瀾秋氣斂羣麓遙望孤飛霞冉冉落鳧浴霞

鳧互下上天水自清縵不知空明底轉映翠微綠疇能  
更攀陟抗跡侶麋鹿緬維石隱流迷虛邁高躡白雲散  
幽襟得句欲題竹清風松際來秫入酒應熟松喬曷可  
期荷鍾從吾欲

永安湖楊柳枝詞

散浦繞長牆胭脂洗晚粧楊家水楊柳到處覆鴛鴦鴛  
鴦通妾夢爲勸楊多種待得種成時楊家已堪痛莫聽  
城頭鴉莫唱楊白花舞裙歌扇銷沈盡惟有楊枝管歲  
華

登尖山望海樓卽事



不游那覺茲山勝况是登高與客來一粟盡收香海界  
千峯橫葬白龍堆窗含吳楚真無際足蹋蓬瀛亦快哉  
祇恐歸逢菜女笑莫教扶醉臥蒼苔

九日遣懷

荆扉迢遞接楓汀暮景依稀入畫屏九日雲山還命酒  
卅年松菊笑設經鴻聲半落寒蘋白霜氣渾歸玉女青  
唯有藁砧多寂寞牛衣回首泣劉伶

尖山登高後復成一律示同遊諸子

落帽何須怯晚颺相於此際足逶迤已叅金粟維摩畫  
頁補青山小謝詩 玉輅春游龍去遠滄江斜日鴈歸

遲白頭拄杖前坡路不盡高臺戲馬思

借差山游淨慈訪主雲上人不值

林霏淨湖淥冬旭半函嶺滉漾晨光流遠帶荒陴景素  
侶欣同攜霜禽遞相引徘徊亭上思出沒冰間影疎鐘  
度遙噓逸興方與永岩巖青蓮宇徐啟妙香境枯禪沒  
于佛夙昔塵慮屏暇寫隔江山非亂復非整緬當締構  
始千載一俄頃祇今十笏地恍坐光明頂飛瀑落檐牙  
餘嵐散衣領日晏君未至詎忍問旋軫惟聽雲外樵吟  
入松厓冷

游壑庵晤破迷益三兩上人同觀小峴廉使石壁

舊刻詩有懷却寄

何年月桂一粒子靈鷲飄墮壑庵底文室天香淡忽流  
半堦溼翠飛不起須彌何必大于芥九華只具壺中體  
廣寒路迷月窟冷一落空山少還理達摩方踏鯨海碧  
益三主金山寺謁普陀回遠公爲剔莓苔紫玉棹有萼破嚴凍荔子  
無人翦荒杞重湖釀雪萬樹雲西日沈煙半江水惠勤  
老去辨才逝歲月奔馳蛇掉尾賴有千秋素太虛畱題  
爲滌風篁耳幽篁簌簌瀑潺潺渺予相思一千里欲緘  
此意問天末目極孤鴻去無已

小有天園

寒原暖未雪流波晶澄潭息駕投西阿聊適意所詣林  
猿苔樵唱僧隱雲半龕誰爲綻襟衲載鶴尋花南

同差山游安隱寺

安平舊蘭若弭楫共幽尋巖壑一奔峭松泉空古今十  
年僧面壁片晷客憑襟曠望人間世天風吹玉琴

除夜有懷夢唐西蜀

林雅散盡雨千絲樞馬空驚歲又馳竹下書堂聞爆竹  
眉山羈客憶顰眉鱗鴻自阻三巴雪蛇鳥奚關入陣師  
一事他鄉差慰意來朝劔外有新詩

拜經樓詩集續彙卷之一

拜經樓詩集續稿卷之二

一起甲子春  
盡乙丑秋

海寧 吳 騫 槎客

不晤思亭幾十載矣春初偶過居易居話舊并示

榕園

以下  
甲子

嚴扉敲破玉梅烟握手俄驚又十年季子貧來仍落魄  
秦樓客去孰游仙一場噩夢徵車散雙硤浮圖雨雪連  
贏得張堪妻子泪翻因思舊濕芸編

西山閑興 二首

蘭臯帶梅嶼隔水迷青勝將覘仙泉根轉躡孤鳥上谷  
雨邊湖鍾白雲松外響

調琴向紫閣下有蔚藍天銅鏡久不汲哀玉猶冷然借  
問雲林衲團蒲今幾年

感興

袖中一片雲欲挂蘇臺樹胸中千載愁欲化吳天雨吳  
樹綠未滋吳雨白于絮惟愁獨泥人相與若有素美人  
在深宮桃花泣春露不如山下艸長繞要離墓

小峴廉使招同陳簡莊徐雪廬陸巨堂游慧山集

寄暢園卽席奉呈兼以識別

篷櫂分破水烟痕桑苧江南尙有村塔古能增晴雪豔  
榭飄益見玉山尊竹爐聯句魚窺研碧洞敲棋鶴應門

珍重東山絲竹意白頭天地一離樽

吳門贈雪廬別

防風古侯國孺子夙能文搖曳春風棹流連日暮雲蘇  
臺同折柳淮海惜離羣身世要離劍雄雌未可分

同半圭差山游慧力寺觀稚川丹井因成小景二首

萬箇虬松掩翠屏一泓寒玉貯仙靈白龍未起佛龕靜  
元豹欲啼山雨暝共倚高梧窺碧甃漫勞修綆汲銀瓶  
從今便結元修社朝餌丹砂夜註經

攜手春風問薜蘿紫微橋外小停舸張華甲第朱絃少  
宗炳雲山畫稿多名是身穴同燭跋老思尸解學蠶蛾



個中彷彿移居景爭奈難摹鮑女何

憶先室四十初度時嘗同游此山

### 明正德豹牌歌

偶得銅牌一長二寸八分廣一寸九分厚二分重八兩文曰隨駕官軍勇士懸帶此牌無牌者依律論罪借者及借與者罪同凡二十七字背面文曰豹字六百十號凡六字並正書下作一豹形蓋明武宗時物也餘詳錢宮詹養新錄

豹實有祿民飢無粥豹則有房安用朝堂羽林七萃生風雷養虎將軍享豹胎子受罪均坐借牌慎勿換酒皇店開毬場廣闢同繩直錦繡圍中干獸入瓊幄鋪花一

百六十有二間一豹不食十豹急江彬出入同臥起此  
牌會否暫離體宸濠逆焰驚天聞豹尾思行三萬里日  
三萬里見穆天子傳君不見黃金罩甲龍鱗耀天鷲飛上遮陽帽  
四姓義子口啣詔今日閹內操來日巡邊微敢諫者死  
疏不報若教四海窮民盡變豹拊掌君王定大笑

海鹽登天寧寺閣却寄鷗舫二首

千佛名經閣登臨世外觀香光初湧塔海氣欲沈樹梓  
澤清觴遠春城玉蕊殘東風知別恨且莫近危關  
空色本非色將歸客未歸碧雲雙鷺下紫甸一驅飛花  
雨前塵在松廊晚磬微更堪張仲蔚攜手素心違

通元道中卽興

招提兩外古窈窕春烟暝中有幽禽語因之生遠情清  
溪淥盈盈佳樹合初榮東風原上來羣動各有營稚兒  
學垂釣少婦洗酒罌扁舟簑笠翁願言且歸耕

風雨上灘圖爲四姪題

明灘暗灘詎知數二月漸江險莫渡連釐駕雲轟地軸  
跋浪掀天天亦怖江狹吹氣作人語似報前程更風雨  
風雨颯沓來何處江南老人江北住買得淳安雙不借  
日牽百丈厓巔去山中妻帑而如鵲谷冰作麋聲漉漉  
一夜哀猿水底哭千里柔腸斷幾曲胡孫渡口灣復灣

老人腰脚生來頑三日無風過米灘囊中便有青銅錢  
汪王廟前貰美酒醉喚客星爲老友一領羊裘半不完  
行藏且作畫圖看請公莫唱上水船人間平地生波瀾

寄醉屈韜園

藉甚珠樓客高懷世味殊琴書載篷艇風雨問菰蘆雅  
咏陶徵士家聲楚大夫相思隨杜若一夜遍東湖

贈沈子

沈子慕織簾之風以差山自號按吳羌山在德  
清縣漢高士吳羌隱此得名凡山經地志皆作  
羌惟南齊書沈麟士傳作差而南史因之并譌

餘不爲餘干竊疑羌差筆跡相近又五季擾亂  
羌夷雜糅或因時諱而易羌爲差亦未可定若  
鄭氏石柱記箋疑以吳夫差得名益臆撰無據  
矣沈子欲辨承傳之譌屬予賦之

吾家有高士伊昔隱清溪學許儒林紹沈雲楨名看仙尉

齊梅子真

夫君志懷古雅號徧畱題重以烟霞癖因之酒

榼提層巖晴散瀑破寺午鳴雞唐皎然有題吳洗盞癯

禪外支頤短塔西漁歌邀子夜蔬筍摘前畦瘦竹吳姬

晝疏松塋鶴樓黛添嵐更好掩以夢兼迷茶戶春旗卓

溪帆雪浪低沈錢多沒徑謝絮不霑泥一往增狂劇何

時手共攜

屠琴隲孝廉寫拂塵庵圖見寄詩以酬之

一斗墨三斗塵祛塵泚墨向空潑幻出千峯懺  
頭雨脚金剛杵墨花飛來大于鼠天邊何處育王城半  
龕古佛枯成精手持木瓢跨東瀛耳聽西陵鼓角鳴高  
入曩結元修侶邀我松花飯同煮何日風吹儂再來回  
頭問佛佛無語披圖感子心纏綿欲擺污泥出青蓮  
勦却却笑老陳搏塵夢一覺踰千年

塘南婦

噫悲哉塘南婦衣百結露雙肘生年一十九綺羅未識

手抄本言身卷之二  
一  
青沐何曾到蓬首君家婦難爲結繩而床甕支牖牖間  
一月海鷗吼養蠶蠶死盡種麥水連畝官符火急雞犬  
走狂且從門來博徒邀以訕烏鵲東南飛籬條西北瓣  
後園作井前池放魚井中水涸蝦蟇樂池魚泣出雙眼  
珠珠出眼卽枯奈此飢腸轉鹿盧可憐腰下三尺組伴  
我幽魂歸九府風淒淒日矇矓三日無棺蛆出踵尙有  
兒胎腹中動

周子桐舍人補輯薛五代史殘本書後

四首  
大令屬

探得遺珠照乘寒陶王以後力尤殫而今却似歐陽稿

好配廷圭墨半丸

宋陶岳有五代史補王禹偁有五代史闕文

溝里沙陀戰血腥五朝遺事太零星阿誰爲語青門客

補史元來別有亭

餘姚邵二雲太史從永樂大典輯錄薛五代史今有刻本以之比較頗多

遺漏借其未見此書也

一局殘棋送曉昏卅年春夢感前塵南朝若問傷心史  
龍衮亡來半不真

參差老屋寄花南彷彿三長昔共說若問對床尋舊約  
祇應風雨泣周曇

臯亭

玉波新雨漲痕加黃鶴磯南晚岫斜惟有荷花如舊識  
暗通香氣到魚艇



吳漁山山水卷 二首

幾度淪塵劫而今喜屬余白雲千嶂合碧樹四時舒墨  
寫先賢井囊餘海嶠書千秋知己在何處問西廬  
之子真高逸江湖迹未賒書摹醉翁帖裁數道元家玉  
軫調清夜雲帆點暮霞思隨天外鴈千里落平沙

畫壁山水歌琴鳴屬題

濛濛淞淞嶺頭霧天天矯矯巖腹樹厓傾斧劈路疑絕  
直下飛泉鐵生鑄壁雷殷殷鞞百里殢殺阿香呼不起  
撇空雨脚橫江來欲與青鸞洗烟尾禿龍拈舞鱗而張  
墨花打面松花香元氣淋漓溢軒榭意匠慘澹不可量

道元思訓疇短長一開一闔倪兼黃倪黃在時不相友  
今日居然借君手野店山坳木末亭夕陽渡口無人行  
哀猿叫斷巫女峽五月揚帆下洞庭洞庭青艸渺綿邈  
萬里滄浪堪濯足不爾爰官繳方卓安得清風吹墮三  
天竺獨木橋九曲岡鐵生當日走且僵疏鐘隱隱雲蒼  
蒼中有太上不死之舊鄉黃石公張子房待我他年五  
老三姑採藥罷攝衣還復升君堂

聞小峴廉使有粵東之命道經構李卽拏舟道

送則已過杉青矣悵然賦此

三首

月波樓下提壺客腰笛猶尋舊釣磯不道飛鳧舟連夜

發空教典却綠簑衣

葵榭風颭柳毵毵月落烏啼曉夢酣不爲蒼生前席計  
肯拚舊雨在江潭

鳴鳩聲裏雨瀾灘送客歸來艸閣寒我以江南賀棹子  
爲誰零落爲誰酸

有以鄴都路引見貽者戲酌一絕

游戲塵寰七十年冥符乞與向誰邊  
沉吟却憶香山句  
歸則須歸兜率天

以褚摹蘭亭寄月珠樓二首

五色榜蒲豔錦暉昭陵遺跡重河南  
他時貴主資奩送

不數神龍第一函

茂林修竹永和春玉躡金蹠世共珍千古高才王內忠  
簪花偏學衛夫人

松靄大令以西夏書列傳見示率題三體

三首

溯魏流源遠平巢受姓還獨思憑險固齊保賀蘭山  
曹憲才通選學申公老尙經畚更取三千華梵閑繙十  
二蕃書

果莊縛後肅西郵史筆霜寒廿二州若比崔鴻方等例  
不妨追配號陽秋

秋日登紫雲山懷古作

秋山夔嶺從秋林森綠緝言遵南澗隈稍憇西巖足鳧  
嶺際天秀風高動羣玉奪蘿窮孤烟遇以肆遐矚鷗波  
蕩湖晴遠澱鱗鱗蹙從知落霞外別有歸漁曲搖搖入  
秋雪茆屋酒初熟由來真隱流陸沈半巖谷樵雲亦樵  
石得句書空綠一臥古松坪千秋緬芳躅

葛蕪園李今生合筆花卉卷蘇孝廉屬題

二一首

芙蓉落盡正涼天玉汁金壺寫暮烟回首銅駝荆棘處  
也應擁髻泣伶元

繡佛閑來刻水沉筆床翡翠伴書琴明明一片花間月  
曾照窮途急難心

送人游成都

秋水粼粼秋葉墮滿頭白髮風吹我半天明月半天星  
送君萬里尋君平拜經樓下一杯酒萬事不如螿在手  
唾壺敲缺霜隼呼明年此日君歸乎

題鮑綠飲茂才韵花軒咏物詩後

五首

玉尺紗厨汗簡量白頭涵泳尙青箱定香亭下清風在  
爭看詩人鮑夕陽

君以夕陽詩著名  
見定香亭筆談

野鶴孤雲意自如遐搜萬卷注蟲魚  
九重欲遂高人願不賜頭銜只賜書

舊恨新愁組織成沉吟往事一淒清短篷蘆渚三更夢

夜雨桐華廿載情

探驪剩有珠盈握  
涉筆皆成龍點精  
可但雞林傳紙貴  
長崎島外識君名

唱和松陵偶寄蹤  
齊雲采藥悔疎慵  
何時更把宣城句

吟上光明頂上峯

君家天都子居白岳  
家山咫尺遙相望也

冬至前一夕與雪帆同飲橫河舟次時聞琴鴈適

越而楫史明日渡江悵然有作示雪帆

夕陽羣鳥下霽雪  
半城寒旅鬢驚長  
至離愁感百端  
裘拚沽酒脫詩到  
畫灰難茲夕  
懷人夢同添  
一綫寬

橫河舟次簡莊過語并以菊奕犀卮見貽率酬二

絕

霜滿河橋雪滿顛故人顛頰故人憐那知殘月如犀角  
猶泛仙家藥玉船

花石誰尋鷗鳥外

玉玲瓏石今在橫河姚氏宅

醉鄉止在橘林邊夢

闌恍憶青城事一局殘棋五百年

石函湖曉起卽景

二首

落月破殘夢霜嚴布被輕徐聞烟浦外柔櫓散鷗聲  
遙峯紆復折凍澗流仍咽初旭上棋林亭臯半紅雪

聞竹汀少詹赴

二首

消息驚傳海上村白頭寧止獨銷魂廿年宰相山中貴



一代經師 帝于尊斜日已符 祇鳥青春風猶記笑顏

溫今年二月見先生於春風亭遂成永訣 祇今夢斷婁江濶 絮酒何由到

寢門

歸然人仰魯靈光 江左風流一旦亡 藥到難延惟歲月  
天畱不死是文章 淒涼薤露三更月 零落棊花萬樹霜  
贏得西州門外路 休教馬策斷人腸

與簡莊觀宋開封石經周禮殘本

吾黨二三子 歲晏還來歸 豈無石凍春 適此銷寒期 閑  
軒炳明燭 圖史互鈎披 煜煜宋石經 照我密坐圍 展卷  
得周官 古錦包陸離 久耳忽在目 能不神爲怡 至和昔

詔刊欲追漢京遺善手楊

南與胡恢

篆眞璧聯璣豕宰

掌邦治體國先王圻更命大宗伯天神爾其司自餘百

執事星散隨烟霏

拓本惟存天官及春官二職餘皆佚

仁廟實令主首築

太平基豈如岐陽狩但刻其魚維緬當輦立初車轂下

成蹊一旦戎馬來鐘簋同顛擠金人辭露盤泣下風淒

淒石鼓橐駝載石經孰提攜民愁柱礎泐僧苦磨礱遲

周禮殘碑在陳畱如如圍佛寺中初寺僧欲醵刻寺區記邑令王夔龍易以他石移置文廟詳中州金石考區

區未澌滅復淪黃河泥翻羨臨安學礮擊餘粉齋我搜

廣政迹推闡孟氏微召南迄於邶攷異存幾希

子從藁圃傳抄

蜀石經毛詩殘本自召南離巢迄邶風終卷止爲攷異一卷

何圖崑山玉駢連桂林

月樓詩集卷之二  
枝得隴而望蜀思熊魚亦隨况君勤著錄懷珠夙探驪  
殘年尙可假猶足懌朝飢如有用我者執此往不疑聊  
託酒人後永侍天官扉

雪帆屬題琴鵑贈畫山水

沈郎工詩詩有畫屠侯妙畫畫卽詩二子相逢一揖罷  
互以毫楮傳瑰奇卽看此懽雖短幅滃成石壁翻天池  
俯有清湍足可濯仰睇不繫非烟馳閑雲野鶴本無意  
胸中邱壑隨所施淋漓元氣滿堂濕赤幟蚤奪荆關師  
寄來正值殘臘盡玉椽香吐餞歲卮憶君爾日方北去  
金焦雪浪高參差高參差傷別緒從茲南高峯雲北高

雨兩地空餘攜手處請將此畫深藏護毋使桓家寒具  
汚直待一朝黃金臺下客歸來更補幾株拂塵庵前紅  
豆相思樹

以火浣布贈簡莊是姚觀察西川所寄

以下乙丑

高麗臺須笠大秦火浣布物以罕見珍名因遠稱著曩  
子燕市還握手道平素憐予雪滿顛脫贈教深護烏雲  
蓋頂門涼颺掀不去漁共樵青言惠浹檢書付朝鮮臺  
笠本朴  
貞蕤檢書貢船攜來簡莊以之轉餉桃投闕李報耿耿恒在慮茲晨聞剝  
啄跋屣起行遽遐哉雙鯉魚何來三峽路上言長相思  
下及書所附身穿火焰雲手摘火雞羽續紡煩搖娘杼

袖幾日暮龍梭瞰鄰壁鼠緯謝丹雘始訝執裂冰既恐  
殺沈霧駕錦亮非匹絞綃奄失步燒踰三晝夜皎潔儼  
如故裁絳細熨貼寒暑絕朽蝨抱之不盈懷服之定無  
數獻琛歷重譯不脛走蠻鋪設產因提前轉櫻燧皇惡  
緬惟博望侯鑿空河源溯僅攜叩竹歸更屑菊醬數豈  
如馬伏波威名銅馬鑄綈袍念舊雨摩盾傳新賦晉殷臣有  
奇布賦髯來告近游節過銀花樹分此伴書燈茶毘僧不  
懼是身本無垢何妨置袍絮簡兮復簡兮兩美洵奇遇  
昔袁簡齋大令得火浣布一方  
尤珍愛之出入恒懸於衣襟

陳半圭耕養圖

羣動各有營農畝固其天大哉子爲養荷鋤南山邊漢  
陰息機事栗里安園田童稚望檐隙遠樹蒼烟微雨  
原上來流泉聲涓涓良苗旣懷新驅犢歸柴關牆頭過  
濁醪用以娛衰顏雖異列鼎烹庶博一日歡聞之庶人  
孝恪艸秀且娟今年禾九稔歲取當十千今秋嘉湖諸  
邑多產瑞禾  
斯道本元嘿神理自綿綿安知天表瑞不因人事先伊  
余感風木披圖涕洟瀾余少日嘗備  
工作風樹圖豈如白華咏可繼  
歸禾編

張叔未解元得時大彬漢方壺詩來屬和

春雷蜀山尖飛棟煤烟綠燭龍繞蜂穴日夜塞百谷開

荒藉瞿曇煉石補天角中流抱千金孰若一壺逐繼美

邦美孫

李斗謂大彬乃宋尚書時彥之裔

智證通相續兩儀始胚胎萬

象供搏掬視以火齊良寧棄薛與暴名貴走公卿價重  
埒金玉商周寶尊彝秦漢古卮盤丹碧固焜耀好尙殊

華朴迄今二百禩譬若鳥過目遺器君有之喜甚獲郢

璞折東招朋儕剖符規玉局松風一以瀉素濤翻雪瀑

恍疑大寧堂移置八甌屋摹形更流咏箋冊裝金粟願

謂牛馬走名陶益補錄嗟君負奇皆探索窮崖隩求壺

不求官千水勝千祿三時我未饜一夔君已足

子藏大彬壺三

皆不刻銘君雖一壺底有歐公詩二句爲尤勝譬如壺九華氣可吞五岳何當

載烏篷共泛畫溪淥廟前之廟後聽遍茶孃曲笑顧邵

文金卿師不盈握

大彬漢方准邵文金能仿之見茗壺系

觀友人演家樂卽事

八首

依依柳色悵離顏千里旌旗望不還翡翠堂前新樂府  
銷魂休唱古陽關

蜀道青驪錦鞵塵淋鈴夜雨却歸秦白頭天寶談遺事  
賺得龜年一曲新

紅豆春風韻管絃桃花扇底繡簾前  
柘枝舞罷楊枝舞  
畫出江南二月天

扶醉歸來下碧油海棠橫臥一枝柔青衫接唾人何在



夢繞西湖舊酒樓

金縷裙拖六幅閑泥人香襟學弓彎南朝若問傷心史  
五百年前謝阿蠻

小隊梨園不夜城瓊瑜低貼地衣平紅雲不怕風吹散  
白髮鐙前看愈明

嬌鶯慢轉隔窗紗掩映蛾眉月半斜欲向東山誇繼美

關于西角見柔些

柔些查伊璜先生女樂名

記共離尊翠硤開三秋不聽紫雲回他年賀老歸田後  
定許吳儂載酒來

晚渡太湖寄蘭貞

一出松陵路五湖春水生誰家吹玉笛離思滿江城翠  
薄嵐將合風迴雨忽晴鴟夷前度夢花落正啼鶯

同黃蕘圃陳簡莊過寒石上人吾與庵適遇石遠

棹同游支硎

一縷法螺際翦然翠欲流松風團玉磬花雨結岑樓自  
得黃江夏因尋許遠游卅年塵土夢能浣虎溪不余不到支

硎幾四十年矣

題寒石見山閣

高閣送春去千山橫玉琴泠泠流水意脈脈故人心平  
楚吞吳甸寒江渺越禽可知塵境外幾寸落花深

手抄本詩集卷之二  
莫圃屬作暮春咏歸圖分韵得今字

鳴鴻遵遠澱春服以時尋  
棧楫石橋岸習習風吹林  
良游曠在昔發興聊自今  
不叩遠公社焉寄靜者心  
禪扇依礪曲經樓碧山岑  
修篁未解苞餘花媚庭陰  
其疑身入畫不辨雲淺深  
夕霏松上來蒼然動歸吟  
前于廣後喁韵以流泉音  
攜手入飛絮芳蘭映重襟  
感彼時運遷幽思誰能禁

崑山晚泊示簡莊

淥水停蓬棹依稀見玉峯  
塔懸千里湖名月寺鎖一樓鐘

入洛才誰及還吳願未從  
蕪羹得鹽豉買醉且從容

蘭貞屬買竹影鐙戲占 二首

三松名譽滿天涯削出昆刀一片霞那及秦家紅袖好

遮儂老眼不生花

膠城竹刻以明朱松及子小松稱三松爲最又有秦一姊傳其派詳陸廷

燦南村  
隨筆

一寸凌雲是我師十年眞悔讀書遲短檠從此休輕弃  
會有占鐙擁髻時

立夏日同簡莊過王述莽少司寇山莊 二首

三泖莊前繫客船橫雲山下送春筵貧來陶令琴猶在

清到王珣宅且捐

時以官述去舊宅別營數椽以居

白髮殷懷惟舊雨

丹鉛脫手盡新編回思花落鶯啼處夢斷西湖又四年

仙郎夙署漢宮名車騎俄從萬里征雞足山高秋懺佛

龍川江險夜燒營

龍川江有鐵索橋至險

一時勳績歸諸將早日

蒞鱸屬步兵皓首龐眉相對好只疑青浦是青城

得小峴廉使嶺南書却寄

芳艸迢迢碧浸渠窮愁兀兀賦閑居一春坐雨千花泪  
兩字加餐萬里書矢志由來元許國憂心何可便然魚  
憑公敬問潮陽廟蕉葉年時幾寸舒

口占與雪帆乞方竹

許惠娉婷竹數竿書堂早晚報平安明朝若載扁舟雨  
根下須畱土氣完

贈蔣秋舫明經兼憫悼亡 三首

橐韋既蟄夏而我亦杜門陰森萬木中臥聽涼蟬喧新  
知日以疎舊雨疇復敦仲蔚東湖來於陵方灌圃握手  
布情素誼若弟與舅有酒斟酌之無酒殫空尊遂令荒  
罔設轉滋笑言溫今子抱新憂破鏡流塵昏來時雙青  
鳥去日惟孤魂望廬思其人歲月徒崩奔高堂素髮稠  
將子且聲吞

聲吞鳥能已展轉空閨裡芳姿掩團扇騎省悲鴛被鼎  
藥尙畱丹機絲餘半綺豈無夢中緣重數團圞理奈彼  
井上桐一夕秋風萎蒼苔絕履迹玉露凋蘭祀蓬萊不

可到弱水三千里欲寄斷腸音泪迸哀絃泚  
絃泚調易沈泪落何時止掉頭牛女夕不覺星期駛人  
生逐化遷彭殤要齊指神傷荀奉倩作達蒙莊子千秋  
萬世下不知竟誰是矧子抱通識見道孰踰此揮手自  
茲別歸翦珠樓紙還將倚戶吟緘慰愁人耳

千元十駕詩

吳趨黃蕘圃主事喜蓄宋刻書籍校讐精審榜其室  
曰百宋一厘余心竊慕之而無其識力惟擬廣構元  
槩佳本取荀子努馬十駕之意顏所居曰千元十駕  
戲占長句寄蕘圃且示蘭莊一笑

少日螢牕忽歲徂白頭空守拜經圖

昔鮑君綠飲嘗購得明鄭改拜經圖

見賸蓋以子有拜經樓藏書也

不知百宋一厘客絕倒千元十駕無雜

曲歌詞防僭濫

元人著述尤繁雜劇歌詞

銀鈎鐵畫戒模糊宋刻以銀鈎鐵

畫爲

尙憑君更向春明匠爲我從容議宅租

### 長夏村居

浮鼻烏健渡水還亂蟬依舊滿柴關不知一片孤雲雨  
又閣何村涼樹間

簡莊擬築文選樓余先爲作圖並係詩以趣之

君家世傳經十二攻選學人呼小秀才豈特爛與熟

昔語

云文選熟秀才足文選爛秀才半

逮乎徵車徵猶日勤陶淑宋元雕故



精近刻徒類鷺建安麻沙翻臨安書棚賣五臣及六臣

較若辨眉目孳都復練京注記窮隱伏如彼安革猛早

著名輩錄

君嘗辨潘岳閑居賦注安革猛革猛乃韋孟之譌安字羨文錢宮詹載其說於養新錄

載之津逮舫沿泳日三復前身豈小宋夢投神人握擬

築百尺樓并兼四部蓄我聞爲欣然亟翦鷺溪綠雲烟

雖小試邱壑聊委紉咄哉新坡南斜露峯一角從今土

鄉堂緬接昭明塾却待松風來時聞續兒讀

### 過蔣夢華園居

一樹大一屋一井碧一亭幽哉君之居一何奇且清四

壁滄洲圖瀟湘延洞庭煙雲繞坐隅風泉滿清聽臨溪

有高閣岌嶸開秋晴落葉鳴  
策策雙峰送餘青佛圖挂  
北牖籤帙盈南榮蒼苔鳥蹟絕  
客至多忘形讀書老樹  
根汲井養丹成緣知開徑意  
不薄求羊名

讀奚處士冬花庵遺稿感成一絕

清寧里中有孝婦未婚而鬢  
泣夫故春風桃李不開門  
爲君長守冬花樹

述莽少寇以三泖漁莊團扇見寄酌以九言長句

先生寄我鼎鼎一團雪江村暑  
退天地俱清涼始驚海

月初更挂瑤島旋疑海扇上已  
來扶桑

霏雪錄海扇當  
三月三日潮退

乃苟非鮫綃乍脫龍女手何緣  
朶雲恰落星渚旁

時七  
夕前

三五柳成陰雙絲繡仙府三江厓定一派通漁莊橫雲  
婀娜本是几案物天馬天矯宛帶蒹蘆鄉數間老屋臨  
溪低結網萬竿修竹隔嶺遙鳴榔主人有時獨抱遺經  
坐琴晝高樓俯聽松風長忘機鷗鳥朝來復暮去依人  
麋鹿相習還相將朝川之景賞玩常不足宮槐舊陌直  
接華子岡丹青得無洛陽郭忠恕不然烟霞艸樹何芬  
芳憶昔先生麾軍出銅壁綸巾羽扇指顧多慨慷剪滌  
穢槍親築受降返林泉雅致白日高羲皇卽今聲望奚  
減羅城叟停雲落月不遺鱗羽荒伴緘更有石上雙玉  
蝶僧繇折枝活脫王元章

同寄向有張文  
敏墨模石刻

仁風鼎味合

我兩心醉逕思昔人千里遂裏糧何時再到龍眠親泚  
筆請圖放翁玉貌家家藏

得查南廬書却寄

一棹西林醉夕暉十年東郭素心違自從班馬門前別  
久闕文楸坐上圍秋樹只看風墜葉春鐙曾照夜縫衣  
賀蘭山下從軍樂藉有魚書慰釣磯

有懷梅史都下 二首

夢裏聯吟醒未忘悠悠離緒較誰長祇言紅豆生南國  
不道佳人在北方燕市豈無千里足唐宮柰有十眉粧  
何時炳燭西牕下其拂吳鴻劍上霜

余近得古劍  
室有寶炭字

千頃琉璃萬玉圍雪篷曾共泛斜暉蟹鮓議後門生散

庚申冬杪曾與樸史同舟至西湖送小峴廉使移任楚南經詰設餘祭酒歸樸史嘗入詰經

精舍今芸臺中丞以憂去九命文章寧有定八行書素

莫教稀潞河秋水桑乾月况是涼風蚤雁飛

小海明經以佛手柑見遺

佛本無身况有手是手卽是佛之心先生攜贈實此意  
要令日夕參潮音想其托根原淨土金柯玉葉芳蕭森  
和風甘雨催結實花開花落珠江潯羅浮仙蝶雙宿處  
彩雲低護層層陰自逐慈航渡炎海蛟龍有爪能相侵  
離枝廬橘豈不美控塵祇足供妖淫小牕六時嘿靜對

非烟非霧清秋深夕陽玲瓏八面照恍焉坐我蒼蘆林  
臨風舞罷小垂手揜袖似欲彈瑤琴稽首維摩重合十  
黃羅漫裹天女襟木犀香裏一彈指分甘遠及勞朋簪  
願君小住爲佳耳聊謀斗酒聽鷗鷺風人尙感木瓜惠  
報之安得雙南金

鄂韉聯吟圖馬愚庵少白屬題

西家尺布難縫衣東家煮豆然豆其利有田家荆樹好  
枝葉何爲一夕橐抱頭感泣荆復榮萬萼元來一本生  
我昨橫湖橋畔棹日光映水花光耀欵門惜未攜新篔  
看君弟勸與兄醉歸來忽復見此冊邀我題詩情脈脈

弄雅軒詩集卷之二  
情脈脈我心獲池塘半畝不須寬似有吟聲徹夢闌還  
將棠棣風人業傳至張公九世看

安平泉上作同簡莊

遠色際秋碧蟬吟高樹閑聲聲橋下水流盡夕陽山

旅夜

不見月華滿方知雨意深雲迷孤雁影秋老候蟲心何  
處高樓夜美人橫素琴宋寥絃指外腸斷爲知音

萬窰五采花熏歌

定陵御宇五十秋物阜民康歌擊壤九鼎無事鑄神姦  
四凶早已投魑魅尙方服御考工職嘉隆遺制陶人仿

風火神仙夙效靈陸鄒二秀名爭仰重瞳顧盼一流電

雨過天青兩摩盪陽嘉不貴鹿盧鐙永樂徒煩果園厥

官哥均汝豈足倫翡翠珊瑚遍搜訪傅粉都虞謝春麗

戲金促織悽秋爽

宣德脂粉箱及戲金蟋蟀盆皆明大內物昔人多見於題咏

崔郎

妙手雖擅昔素女傳神非雅賞

並詳萬曆野獲編

獨憐團扇雙

錦合五色光騰龍混漾風前彩雲吹不散露下珍珠搖

更響衆竅星羅簇圍蓋底樣非孟亦非盎中分七格蓮

佈瓣蜜割蜂房花暗養濃蒸冠帔百和韻朝夕想擊仙

女掌無恠民間曾未識辟彼霓裳本天上斯器人言昌

化遺曾充裝送隨奩往

明昌化伯邵林孝惠太后之父其後尙有女嫁袁花祝氏充奩



具滿堂金玉伴撒帳載以後車知幾輛億當擊盞催粧

時詩思如花熏愈長茂陵玉盃俄出世戚死殊榮朝露

灑大江東去沙淘浪孤冢西湖日榛莽林本業湖沙葬南屏山規制極

宏至今人呼展轉流移落好事香筵錫類輸周黨周松

邵皇親續令昔有花熏一具娶媳時以佐花燭筵人稱其雅我今得此復何爲鶴卵雞缸

半塵網索其田家老瓦盆耦耕好薦枯魚鱖

秋日過西山惠力寺訪舊適素公新鑿小像成并

系小峴方伯壬戌秋畱偈及同游諸人題句卽

事成咏兼寄方伯

白日巖扉迹未淪烏篷仍繫谷湖滑從來玉帶投山客

省識青砧染汗人

惠力寺相傳晉尙書張延光故宅有搗衣石故迹

蟲語商量

泉語細秋容洗鍊佛容新紫薇題字分明在何日同參  
不壞身

子夜吳歌

悠悠復悠悠商歌入素秋闔閭城下水浣得幾多愁濁  
酒不禁醉無家同海鷗千金一擲盡前路別離休

子夜秋歌

西風何處來遙夜橫塘曲鴛鴦不雙飛佳人長獨宿夫  
容露粉涼秋艸含烟綠霸業自銷沈翻教怨麋鹿

有懷耕烟山館新疊小山

花石玲瓏取次安壺中日月洞中寬溪聲半效廣長舌  
山色多歸小善卷從古畫圖元假試祗今邱壑任窺觀  
不知繡罷雲牕子幾度臨風翠袖寒

蘭陵道中

檣楫練湖澁始見雲陽城丹楓半霜色迢遞連雲平依  
微珠塔光孤標極天撐京江帶其下百里秋濤驚哀鴻  
愁未度遠薺天邊明長途豈不懷利涉非所爭如何東  
逝波流盡古賢英村膠薄難醉城角沈秋聲感彼孤蓬  
轉空傷遲暮情

渡揚子江

無恙輕帆興可乘  
曉烟初泮日初升  
青山盡欲趨京口  
白雁遙應指秣陵  
斷角淒涼悲戍遠  
寒濤嗚咽報秋增  
遐思今古無窮事  
一首蕪城賦未曾

九日同人平山堂登高

紅橋秋柳乍堪攀  
綠水漪漪遠四環  
百歲登高曾幾客  
千秋勝覽說平山  
烟花南部人如夢  
歌吹西林菊自斑  
酩酊不知江月上  
輕舸緩載二分還

重九後一日伊墨卿太守招余游平山堂時棧  
客先以九日游此有詩卽用其韵寄之

無錫

秦

瀛

凌蒼

卅年勝地失躋攀，重到斯堂碧四環。  
松磴寒飛過溪雨，寺門翠落隔江山。  
良朋對酒尊都綠，佳節懷人菊已斑。  
羨殺鹽官城外客，滿船載得月明還。

揚州雜詩

三首

小秦淮口上輕航，十里紅橋景未荒。  
雅背斜陽驢背酒，平山堂上作重陽。

汴水東流幾暮霞，楊枝無力載飛花。  
千秋一覺雷塘夢，何必申申怨麗華。

丞相祠堂凜舊容，精靈五夜泣孤忠。  
不知霜染丹楓色，猶認京江戰血紅。

王明君詞

黃沙漠漠塞塵連一曲琵琶馬上絃枉殺畫工君自誤  
傾城可是筆能傳

拜經樓詩集續編卷之二